

Nakon optužbi „Doma“ na račun Općinskog suda

Salihović: Pustite nas da radimo po zakonu

Udruženje sudija FBiH osudilo napade na sud • Nosiocima stanarskog prava dozvoljen otkup, dok je uknjižba pitanje koje nije definirano zakonom

Predsjedništvo Udruženja sudija/sudaca Federacije BiH osudilo je „kontinuirane napade“ na Općinski sud u Sarajevu i njegove sudije, koji su nedavno kulminirali i pismenim prijetnjama upućenim zemljišno-knjižnim referentima tog suda iz Udruženja građana za zaštitu nosilaca stanarskog prava na nacionaliziranim i privatnim stanovima, saopćilo je ovo udruženje.

Rad pod pritiskom

Predsjedništvo ovog udruženja pozvalo je nadležne organe i Visoko sudsko i tužilačko vijeće (VSTV) BiH da hitno poduzmu mjere i aktivnosti za zaštitu ne samo ovog, nego svih sudova i sudija u Federaciji i BiH od neprimjerenih pritisaka.

Goran Salihović, predsjednik Općinskog suda u Sarajevu, kaže da uknjižba nacionaliziranih stanova nije zaustavljena, jer je oko 150 predmeta riješeno po žalbi i upućeno Kantonalnom sudu na daljnji postupak.

- Općinski sud treba pustiti da sudi po zakonu, a ne da radi pod pritiskom. Ova institucija

Dnevni avaz, 06/04/2007



Salihović: Nisam zaustavio uknjižbu

neće podleći bilo kakvom pritisku, ucjeni ili prijetnji - naglašava Salihović.

Neuređena pitanja

Podsjećamo da je sredinom prošle godine usvojen Zakon o izmjenama i dopunama Zakona o otkupu stanova, koji omogućava nosiocima stanarskog prava otkup stambenih jedinica,

a bivšim vlasnicima se dodjeljuju zamjenski stanovi.

Izuzetak predstavljaju stanovi vakufa, legata ili zadužbina, jer je po zakonu nosiocima stanarskog prava dozvoljen otkup samo u slučaju ako to dozvole vjerske zajednice. Međutim, u zakonu nije jasno precizirano da li se uknjižba otkupljenih i zamjenskih stanova mora vršiti istovremeno.

Kako „Dnevni avaz“ nezvanično saznaje u Federalnom ministarstvu za prostorno uređenje, Zakon o izmjenama i dopunama Zakona o otkupu stanova FBiH će se najvjerojatnije morati ponovo doradivati.

- Da bi ovo zakonsko rješenje funkcioniralo, još mnogo stvari se mora riješiti. Također, vrlo je kompleksno pitanje uknjižbe stanova. Neosporno je da je nosiocima stanarskog prava dozvoljen otkup, ali nije definirano ko treba bivšim vlasnicima osigurati zamjenske stanove i iz kojeg stambenog fonda. Mnogo je neuređenih pitanja - kaže naš sagovornik koji je želio ostati anonimn.

A. DEDAJIĆ

Žuljević: Hoće da nam zatvore usta

Prema riječima Zorana Žuljevića, člana Koordinacionog odbora Udruženja „Dom“, istina je da je ovo udruženje napisalo da će podnijeti krivične prijave protiv službenika Općinskog suda, ali samo iz razloga kako bi se utvrdilo ko je zaustavio uknjižbu nacionaliziranih stanova. Napominje da je saopćenje koje je izdao Općinski sud pokušaj da se „Domu“ zatvore usta, te da se ovom Ud-



Žuljević: Pokrenut postupak

ruženju onemogućiti nastavak rada.

- Smatramo da se Općinski sud nakon nekoliko mjeseci prvi put javno oglosio, jer smo mi razgovarali prije nekoliko dana sa Brankom Perićem, predsjednikom Visokog sudskog i tužilačkog vijeća (VSTV) BiH, i zato što je Ured disciplinskog tužioca pokrenuo postupak u vezi s nepravilnostima u radu Suda - ističe Žuljević.